

REVISTA SITUASAUN ABRÍL 2015

ASUNTU NE'EBÉ PRESIZA TAU ATENSAUN

- ▶ **Númeru insidente violénsia ne'ebé rejista iha fulan Abril 2015 konsidera nudár númeru ida aas liu hotu, hafoin estabelese tiha AtReS iha 2009**
- ▶ **Insidente violénsia aumenta tanba atuasaun husi pesoál PNTL no F-FDTL ne'ebé uza forsa liu, disputa rai no konflitu entre joven**

NÚMERU INSIDENTE VIOLÉNSIA NE'EBÉ REJISTA IHA FULAN ABRIL 2015 KONSIDERA NUDÁR NÚMERU IDA AAS LIU, HAFOIN ESTABELESE TIHA SISTEMA ATRES IHA 2009

Iha fulan Abril 2015, númeru insidente violénsia ne'ebé rejista liu husi monitorizasaun ekipa AtReS hamutuk 122, no ida ne'e konsidera nudár númeru aas liu hotu hafoin estabelese tiha Sistema Atensaun no Responde Sedu (AtReS) iha tinan 2009. AtReS mós rejista insidente violénsia iha Munisipiu Dili hamutuk 48, ne'ebé konsidera aas liu kompara ho Munisipiu sira seluk. Númeru insidente violénsia ne'e konsidera dala rua boot liu fali númeru insidente ne'ebé rekolla durante fulan 13 ikus (Marsu 2014 – Abril 2015) ho nia médiu (rata-rata) kada fulan insidente 19.2. AtReS mós rejista númeru violénsia ba fulan Abril 2015 iha munisipiu balun sa'e maka'as bainhira kompara ho dadus husi fulan 13 ikus, númeru hirak ne'e mak hanesan tuir mai:

- Baukau rejista insidente 12 iha fulan Abril 2015, boot liu númeru médiu (rata-rata) insidente 7 kada fulan;
- Oekusi rejista insidente 11, boot liu númeru médiu (rata-rata) insidente 8.4 kada fulan;
- Likisá rejista insidente 9, boot liu númeru médiu (rata-rata) insidente 7.1 kada fulan;
- Lautein rejista insidente 6, boot liu númeru médiu (rata-rata) insidente 3.9 kada fulan;
- Manatutu rejista insidente 5, boot liu númeru médiu (rata-rata) insidente 2.8 kada fulan.

Totál insidente violénsia fulan Abril 2015	
Distritu	Insidente
Aileu	3
Ainaru	6
Baukau	12
Bobonaru	2
Covalima	3
Dili	48
Ermera	4
Lautein	6
Likisá	9
Manatutu	5
Manufahi	5
Oekusi	11
Vikeké	8
Totál	122

Tanba sá mak númeru insidente sa'e maka'as iha Abril 2015? Tuir ami nia análise, iha kestaun prinsipál 3 mak sai abut ba insidente hirak ne'e mak hanesan; Atuasaun ho forsa ne'ebé maka'as liu husi Membru PNTL no F-FDTL, Komunitade Envolva iha Disputa Rai no Joven Envolva iha Konflitu.

1. Atuasaun ho Forsa ne'ebé Maka'as Liu husi Membru PNTL no Falintil-FDTL. Iha fulan Abril 2015, akontese insidente violénsia 15 ne'ebé envolve pesoál forsa defeza no seguransa. Husi insidente hirak ne'e, insidente violénsia 10 iha ligasaun ho Membru PNTL no 5 seluk husi Membru F-FDTL. Númeru ne'e mós konsidera aas liu kompara ho númeru insidente violénsia iha fulan sira antes ne'ebé rejista de'it insidente 4 kada fulan.

Husi insidente violénsia 15, insidente 7 akontese iha Baukau ne'ebé iha relasaun ho operasaun husi Komandu Operasaun Konjunta (KOK) HANITA, ne'ebé insidente 2 envolve pesoál PNTL no 5 seluk envolve husi pesoál F-FDTL. Tuir monitorizasaun, Insidente ida akontese iha area Suku Tirilolo, Postu Administrativu Baukau ne'ebé membru KOK tiru ba joven balun bainhira sira la halo tuir sirkulár ne'ebé fó sai bainhira KOK atu pasa revista, no KOK mós halo tiru ameasa ba joven sira ne'ebé ba toos iha área Buruma. Insidente seluk ne'ebé rejista mak iha lora 07 Abril 2015, maizumenus tuku 06.00 lokraik, iha Aldeia Asanunu, Suku Soba, Postu Administrativa Laga, Munisipiu Baukau akontese membru KOK tiru comunidade ne'ebé deskonfia nudár membru KRM, nune'e sira halai no ida monu ba rai naruk to'o mate. KOK mós halo tiru ba comunidade sira ne'ebé halai sees husi operasaun, no iha duni comunidade ida mak hetan tiru iha ain no lori ba Ospital Referral Baukau hodi halo tratamentu. Operasaun KOK realiza hodi halo atuasaun ba kazu asaltu Polisia iha Suku Saclari, Postu Administrativa Laga, iha fulan Janeiru 2015, no atake ba Prezidente Parlamentu Nasionál, Señor Vicente Guterres ho nia seguransa pesoál iha fulan Marsu iha Postu Administrativa Baguia, Munisipiu Baucau.

Iha tan insidente violénsia 8 seluk mak envolve pesoál PNTL, maibé insidente hirak ne'e la iha ligasaun ho KOK. Ami nia monitorizasaun rejista insidente violénsia 7 ne'ebé pesoál PNTL sira komete bainhira sira ba halo atuasaun ba konflitu komunitária no ida seluk hanesan problema privadu pesoál PNTL nian. Ezemplu insidente ne'ebé envolve parte seguransa mak; insidente 2 ne'ebé pesoál PNTL baku jornalista no hasai liafuan katak "imi jornalista sira buka de'it ami nia sala". Insidente violénsia ne'e akontese iha Suku Bairo Pite, bainhira jornalista foti fotografia membru PNTL ne'ebé halo hela atuasaun ba problema. Ezemplu seluk akontese iha Becora ne'ebé Joven mane ida mak baku nia inan-aman no estraga sasán uma laran, entaun inan-aman bolu Polisia, no bainhira to'o iha fatin, membru PNTL sira kaer joven ne'e hodi baku, tuku no tebe to'o isin lolon hotu bubu.


Insidente violénsia ida seluk liga ba Pesoál PNTL, ne'ebé kategoria problema privadu mak Pesoál PNTL tuku no tebe katuas ida iha Fatin Futu Manu nian iha Suku Caraubalo, Postu Administrativu Vikeké. Pesoál PNTL baku katuas ne'e ho razaun katuas ne'e mak hato'o keixa ba Komandu PNTL hodi muda nia ba fatin seluk, tanba Membru PNTL ne'e fó oan ba katuas ne'e nia oan feto.

2. Komunitade Envolva iha Disputa Rai; Husi gráfiku hatudu katak, iha insidente violénsia 19 mak "hun no abut" konfliktu mai husi disputa rai ba uma hela fatin no toos/natar, ne'ebé kuaze dala rua barak liu husi número baibain ne'ebé rekolla kada fulan. Iha insidente 7 mak hahú akontese bainhira Komisaun Nasionál Cadastral (CNC) hala'o programa Sukat Rai, hafoin kauza comunidade sira ne'ebé reklama ba rai istori malu no baku malu. Enkuantu iha disputa rai hamutuk 12 akontese entre comunidade no entre família sira.


3. Joven Envolva iha Konfliktu; iha insidente violénsia 42 ne'ebé "hun no abut" konfliktu liga ba joven sira. Número insidente hirak ne'e konsidera dala rua boot liu número ne'ebé rekolla durante fulan 13 ikus ho médiu (rata-rata) insidente 19. Número violénsia liga ba juventude ne'e barak liu akontese iha Munisipiu Dili ne'ebé hamutuk insidente violénsia 23, no restu akontese iha munisipiu seluk. Kategoria insidente violénsia ne'ebé iha relasaun ho joven mak hanesan:

- Tuur hamutuk hemu tua, depois lanu ona, kontinua ho tuda malu no baku malu. Iha Munisipiu Dili, insidente ho kategoria hanesan ne'e, hamutuk 17;
- Iha mós insidente balun kona-ba joven envolve iha grupu Arte Marsiais ne'ebé governu taka tiha ona, inklui insidente balun ne'ebé akontese tanba problema iha pasadu hodi hamosu baku malu iha estrada, merkadu, fatin festa no iha eskola;
- Alende ne'e iha mós insidente balun mak envolve joven sira iha disputa rai entre comunidade no membru família.


KARATERÍSTIKA INSIDENTE




Insidente Fatin




Metodu Violensia




Tipu Violensia




Se Mak Vitima Nia Jeneru




Hun no Abut Konflitu



Se Mak Hahu / Halo Violensia



Se Mak Responde




Saida Mak Ema Hahu Violensia Nia Jeneru



Revista situasaun ne'e relata kona-ba asuntu xave relasiona ho insidente violénsia no tendénsia konfliktu husi koleasaun dadus monitorizasaun liu husi Sistema Atensaun no Responde Sedu (AtReS), ne'ebé kobre iha postu administrativu 43, suku 208, husi Postu Administrativa 65 iha Timor-Leste durante Abril 2015. Belun esforsu atu fahe informasaun ne'ebé up-to-date no serteza ho dadus atuál. Hanoin katak, bele hetan mudansa situasaun ho lalais husi kontribuisaun dame ita hotu nian. Ami agradelese no simu informasaun seluk ne'ebé bele klarifika ka update dadus ne'ebé ami iha liu husi sistema AtReS.

Marilia Oliveira da Costa, Jestor Sistema AtReS: bylah.belun@gmail.com

Laurensius Lein, Espesialista Prevensaun Konfliktu & Polítika: laurensius.belun@gmail.com



ATIVIDADE PREVENSAUN NO RESPONDE BA KONFLITU

Atividade Ne'ebé Hala'o Husi Ekipa Atensaun no Responde Sedu (AtReS)

- ▶ Iha loron 13 Abril 2015, Ekipa Belun hasoru malu ho Sekretáriu Estadu Juventude no Desportu (SEJD), Sr. Leovigildo Hornay, hodi fahe informasaun relasiona ho servisu AtReS ba fahe dadus monitorizasaun ba insidente ne'ebé liga liu ba Juventude no Jogu Komunitária. Sorumutu ne'e kooperativu no amizade tebes, no iha sustentabilidade ba futuru entre Belun no SEJD.
- ▶ Iha loron 24 Abril 2015, Belun realiza enkontru preparasaun ho parseiru sira iha Postu Administrativa Maubisse atu realiza Tara Bandu, nune'e bele minimiza kustu ba serimónia tradisionál sira. Enkontru ne'e mós hetan partisipasaun husi Jornalista South-East Asia Globe ne'ebé interese atu hatene oinsá AtReS nia servisu prevensaun konfliktu iha baze;
- ▶ Iha loron 30 Abril 2015, iha Belun, Ekipa AtReS enkontru ho Pontu Fokál Diresaun Nasionál Prevensaun Konfliktu Komunitária (DNPCK) Munisipiu Dili nian, hodi reforsa kooperasaun entre Monitor AtReS no Pontu Fokál DNPCK nian iha programa prevensaun konfliktu.

Atividade Ne'ebé Hala'o Husi Ekipa Mediasaun no Rezolusaun ba Disputa (MRD)

- ▶ Iha loron 29 Abril 2015, Ekipa MRD, fasilita mediasaun disputa rai entre membru família iha Suku Holsa, Postu Administrativa Maliana. Ekipa MRD Belun hamutuk ho Diretór DTPSC ho nia ekipa fasilita mediasaun ba disputante. Rezultadu sei tama iha segundu faze hodi envolve lia na'in hodi fahe no entrega rai/propriedade;
- ▶ Fasilita mediasaun disputa rai entre membru comunidade iha Aldeia Lesu, Suku Tapo Memo, Postu Administrativa Maliana, Munisipiu Bobonaro. Akordu entre disputante ne'e iha ona iha 2010 maibé too ikus parte balun la kumpre akordu ne'ebé hakotu ona. Solusaun final mak sei envolve lider lokál no lia na'in ne'ebé sai sasin ba akordu ne'ebé sira halo iha 2010 no parte hotu sei halo tuir akordu ne'ebé iha ona. Mediasaun sei tama mós iha segundu faze iha fulan Maiu nia laran.